

DOMENIE XIII «VIE PAL AN» Jutoris pe Liturgjie

Ai 2 di Lui dal 2017

La messe di cheste domenie midiant de prime leture e dal vanzeli nus mene a cjacarâ di ospitalitât, une peraule deventade tant dificile di gestî. Di fat se fin a cualchi desene di agns indaûr lis puartis des cjasis e i cancei dai curtîi a jerin vierts no dome vie pal dì, ma cualchi volte ancie di gnot, cumò dut al è sierât, cerclât di un mûr e vuardeât di un cjan. A pesin sore di nô i rifugjâts, i profugos, i clandestins che a zirin cence fâ nuie pai païs, i teroriscj de Isis, i laris e un suspiet gjeneralizât su ducj e su dut.

Epûr, il nestri pari Abram al ospità trê viandants (Gjen 18, 1-8); Lot al dè sotet cuintrî ogni bon sens (19, 1-3), une vedue che e murive di fan e tignì in cjase Elie un forest (1 Rês 17, 7-16) e la femine de leture di vuê e ospitave normalmentri un pelegrin di passaç, Liseo.

L'ospitalitât par nô Furlans e reste, ancie se no je di mode, parcè che i nestris paris a son partîts emigrants e vuê o vin di dâ a altris chê ospitalitât che in altris temps o vin ricevude.

Come cristians il Signôr nus ordene: Voleit ben al forest, parcè che ancie vualtris o sêts stâts forescj (Dt10, 19) e Gjesù nus vise: O jeri pelegrin e mi vêts sotetât (Mt 25, 35)

Al è dome di viodi, te cunfusion balarine e pericolose di vuê, cemût meti in pratiche cun pazienze e buine volontât une ospitalitât che fin de antichitât e je simpri stade ritignude sacre in dutis lis religjons e civiltâts. Però: une ospitalitât fate di bon sens, di dirits e di dovêts e je sacrosante ancie in Friûl.

Antifone di jentrade Sal 46,2

Batêt lis mans, popui de tiere,
scriulant al Signôr in ligrie.

Colete

Diu, che midiant de tô gracie
tu âs volût ch'o deventassin fis de lûs,
danus par plasê di no jessi invuluçâts dal scûr de falsetât
ma di restâ simpri lusorôs cul sflandôr de veretât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETTURE

2 Re 4,8-11.14-16

Chel chi al è un om di Diu, un sant; ch'al resti culi.

Liseo al è vivût tal secul IX p.d.C.; Sunem e jere une borgade tal ream di Israel. A la femine de leture, tal passâ dal temp, i ven di concludi che Liseo al è un sant, un om di Diu e e pense di parecjâi une cjamarute dute par lui.

Dal sigûr ancie fra profugos e rifugjâts al sarà cualchi sant e om di Diu e ancie nô come la femine di Sunem o vin di dâi une man e fâi bon acet. Tignin presint ce che e dîs la letare ai Ebreus: No stait a dismenteâsi di vierziur la puarte a ducj; fasint cussi, cualchidun al à lozât, cence savêlu, i agnui (Eb 13,2).

Dal secont libri dai Rês

Une dì che Liseo al passave par Sunem, une femine di cjase grande ch'e jere a stâ avenir, lu invidà a gustâ. Daspò, ogni volte ch'al passave, al leve li di jê par mangjâ. Jê i disè al so om: «Cjale: o soi

sigure che chel om ch' al passe simpri par ejase nestre al è un sant, un om di Diu. Parcè no i fasino une cjamare adalt, di mûr, e i metin un jet, une taule, une sente e un lampion? Cuant che al passarà par chi di nô, al podarà ritirâsi lassù». Une dì ch' al capitâ alî, si ritirà te cjamare adalt e si distirà sul jet. I disè al so famei Ghecazi: «Clamimi cheste buine sunamite». Le clamâ e jê si presentâ denant di lui. Liseo al continuâ: «Dîsii: Tu ti sêts tant disturbade par nô. Ce si puelial fâ par te? Ese une peraule di dî par te al re o al sorestant dai soldâts?». Ma jê i rispuindè: «Jo o stoi cul gno popul». Al zontâ: «Alore, ce si puelial fâ par jê?». Ghecazi al rispuindè: «Poben jê no à fruts e il so om al è in là cui agns». Dissal Liseo: «Clamile». Il famei le clamâ e jê si fermâ su la puarte. I disè:
«L'an ch' al ven, come cumò, tu braçolarâs un fi».

Peraule di Diu.

SALM RESPONSORIAL

dal Salm 88

Ancje in zornade di vuê i tiei insegnaments, Signôr, il to boncûr e peraule a son par nô tant che un lampion ch' al lûs tun lûc dut scûr (cfr. 2 P 1, 19). Par chest o podin dîti:

R. O cjantarai il to boncûr cence polse.

Se cjantât: Il cjant dai salms responsoriâi, p. 63.

O vuei cjantâ il to boncûr, Signôr, cence polse,
di ete in ete cu la mê bocje
o contará trop che tu sêts di peraule.
Parcè che tu âs dite: «Il gno boncûr al è par simpri,
la mê fedeltât e je salde come il zîr des stelis». R.

Furtunât il popul ch' al è bon di laudâti,
ch' al va indenant, Signôr, cul sfandôr de tô muse.
Tal to non dut il dì al è in gjonde,
te tô justizie al ejate la sô glorie. R.

Parcè che tu sêts tu la fuarce che nus fâs vinci
e tal to boncûr il nestri cjâf tu alcis.
Al è propit il Signôr il nestri scût,
e il Sant di Israel re nestri. R.

SECONDE LETURE Rm 6,3-4.8-11

O sin stâts sapulîts cun Crist in fuarce dal batisim par unîsi a la sô muart, cussi ancje nô o vin un mût di vivi gnûf crei.

La nestre salvece no je tun sfuarç sovruman che mai al podarà sfrancjânus de debolece dal pecjât e dal destin de muart. La nestre salvece e je tal unîsi al amôr di Crist. Chest, pal cristian, al è sucedût mdiant dal batisim che nus à dât il Spirit di Crist e in lui la pussibilitât di praticâ un mût di vivi gnûf crei. Ma a son realtâts che no si rive a mastiâlis tun marilamp.

De letare di san Pauli apuestul ai Romans

Fradis, ducj nô, ch'o sin stâts batiâts in Crist Gjesù, o sin stâts batiâts par unîsi a la sô muart. O sin duncje stâts sapulîts cun lui in fuarce dal batisim par unîsi a la sô muart, cul fin che, come che Crist al è resurît dai muarts midiant de glorie dal Pari, cussi ancje nô o vin un mût di vivi gnûf crei.

Se po o sin muarts cun Crist, o crodin che cun lui ancje o vivarìn, savint che Crist, resurît dai muarts, nol mûr plui e la muart no varâ plui nissune paronance sun lui. Par chel ch' al rivuarde di fat la sô muart, lui al è muart al pecjât une volte par dutis; par chel ch' al rivuarde invezit la sô vite, lui al vîf par

Diu. Cussì anje vualtris consideraitsi muarts par simpri al pecjât ma vîfs par Diu in union cun Gjesù Crist.

Peraule di Diu.

CJANT AL VANZELI

1 P 2,9

R. Aleluia, aleluia.

Vualtris o sêts la gjernazie sielte, i predis e i rês, la int sante; contait lis grandis voris di Diu, che us à clamâts dal scûr a la sô lûs sflandorose.

R. Aleluia.

VANZELI

Mt 10,37-42

Chel che nol cjape sù la sô crôs daûr di me, nol è degn di me. Chel che us aceté vualtris, mi aceté me.

Chest toc di vanzeli al continue il discors di Gjesù ai apuestui che a stan partint pe lôr mission ma si vierç anje a lis personis che a ospitaran i dissepui di Gjesù tes lôr cjasis. Chel che Gjesù al mande al pò jessi un profete – persone semplice ma che e viôt plui in là di ce che e viôt la int - o un just che al vîf la vite concrete di ogni dì tal spirt di Crist, o un, di chescj piçui, che i e metin dute par stâ cul Signôr ma a àn dibisugne di jessi sostignûts inte fede.

Nol covente jessi predis par jessi mandâts dal Signôr.

Lis personis che a ospitin un di chescj dome parcè che al è o profete o just o de categorie dai piçui e ospite Gjesù stes parcè che lui al à dit: Chel che us aceté vualtris mi aceté me...

Dal vanzeli seont Matieu

In chê volte, Gjesù al disè ai siei dissepui: «Chel che i vûl ben al pari o a la mari plui che no a mi, nol è degn di me; chel che i vûl ben al fi o a la fie plui che no a mi, nol è degn di me. Chel che nol cjape sù la sô crôs daûr di me, nol è degn di me. Chel che al varà ciatade la sô vite, le pierdarà; e chel che al varà pierdude la sô vite par colpe mê, al tornarà a ciatâle.

Chel che us aceté vualtris mi aceté me e chel che mi aceté me al aceté chel che mi à mandât. Chel ch' al aceté un profete par vie ch' al è profete, al varà la ricompense di un profete. Chel ch' al aceté un just par vie ch' al è just, al varà la ricompense di un just. Chel che i varà dade magari dome une tace di aghe frescje a un di chescj piçui, par vie ch' al è gno dissepul, us al dîs in veretât: nol pierdarà la sô ricompense».

Peraule dal Signôr.

Su lis ufiertis

Diu, che tu operis cun fuarce intai tiei misteris,
fâs, par plasê,
che la nestre devozion e sedi simpri degne dai tiei sants regâi.
Par Crist nestri Signôr.

Antifone a la comunon

Sal 102,1

Benedis, anime mê, il Signôr:
dut ce ch' al è in me il so non sant al benedissi.

O ben:

cf. Zn 17,20-21

Pari, ti prei par lôr, par ch' a sedin anje lôr un in nô,
di mût che il mont al cognossi che tu tu mi âs mandât,
al dîs il Signôr.

Daspò de comunion

Cheste vitime divine ufierte e ricevude
che nus fasi vivi, Signôr,
par che, saldâts daprûf di te cuntun amôr che nol cognòs polse,
o podedin produsi un ben ch'al dure par simpri.
Par Crist nestri Signôr.

* * *

Riflession di pre Antoni Beline: No cuintri nature ma plui indevant

Fedêl al stamp dai profetis ch'a predicjavin une religjon ungrum esigjent e di fonde, ancje Crist al pratint dai siei une sielte radicâl, rissolude, complete, che ur impegni dut e ju impegni ducj cence stâ a cincuantâ e a tirâ sul presit. O cun lui o cuintri di lui. E lui al pratint dut. Almancul te intenzion e te buine volontât...

Vanseli par un popul, an A, p. 158

* * *

Sante messe e Eucaristie, rîts, preieris, ejants: Hosanna pp. 34 - 119.

* * *

L'an passât mi è capitât, tor misdì, un marochin cu la diabete. I vignive imbast. I ai dit se al mangjave un miluç o se al cjoleve un cafè. Mi à rispuindût che al jere daûr a fâ il Ramadan. "Ma culì nissun no ti viôt". "Allah al viôt par dut". "Ma cu la diabete tu puedis lâ in ipoglicemie e mûrî". "Se Allah al à distinât che o mueri, al vûl dî che e je ore". Insome al à acetât dome une tace di aghe cuntune pierute di zucar a fuarce di vitis.

In conclusion, o ai decidût di ricuardâ il batisim dai cristians di Visepente cuntune coriere fint in Maroc. Autist il plevan e biljetari il muini. No par deventâ musulmans, che no nus tegnin, ma par deventâ serios, che e sarès ore passade.

Pre Antoni Beline, Cirint lis olmis, 4.

* * *

- * *I ejants, salms e ejantadis a vegnин ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il ejant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*